



Sabtu, 25 Pebruari 2023

Ogen: Ulangan 18:5



Ipilih Guna Ngelai



Lit sada suku i bas bangsa Israel si la ibereken taneh pusaka, e me kap suku Lewi. Engkai maka bage? Sebab suku e likususkuen Tuhan guna jadi si ngelai i bas kemah Dibata. Tapi, amin gia la lit taneh man cametenna, man bana ibereken rejeki arah persembahen si ipersembahkan suku-suku si deban i bas rumah pertoton nari. Kerina persembahen i bas suku-suku sideban nari bagi lembu, kambing, domba, bagin paha si arah lebe, rahangna ras bagin beltekna arus ipersembahkan man imam kalak Lewi. Bage pe ulih si pemena arah gandum ras anggur, minak bage pe bulu rubia-rubia jadi bagin imam. Si enda kerina ijadiken Tuhan sada aturen sabap suku Lewi kin ateNa ipakena guna jadi sierdahin bas rumah pertoton. Kerina manusia itepa Dibata secara unik, tapi pelain-lain kerina tugas siibereken Dibata man banta. Alkitab ngajarken kita maka lit kalak si idilo kusus jadi serayan Tuhan. Tapi arah Padan si Mbaru pe ikataken i bas I Pet.2:9 maka kita enda nggo jadi imamat rajani, si ngaloken tanggungjabap guna mpekenakena pelayanen erpalasken talentata. E maka kerina nge kita igelari selaku serayan Tuhan, jadi aron Dibata guna ndalanken peratenNa ndarami jiwa-jiwa gelah reh ku Tuhan ras ersembah man bana. Tuhu dahin e labo menukah. E maka lit pelayan kusus, "kalak lewi" si arus focus ras lit bas ia pusuh si tuhu-tuhu nggit ipake Tuhan arah gerejaNa. Tapi kita si la kalak lewi pe mari ngelai erpalasken kinitekenta. Kerina si enggo ipilihNa guna ngelai Dibata arus tetap ukurna ula mbewat-mbewat. Tujun kita itepa ras ipilih jadi serayan Tuhan e me guna ngelakoken dahin-dahin si mbelin. Kerina si ngerongketi i bas ndahiken dahin e arus ibersihken. Ula padah aru kerna kai si man pangan ras kai si man inemen, sabap krinana isediaken Tuhan, bali ras ia ncukupi keperluan kalak Lewi. Bage pe ula ragu ndalanken peraten Tuhan. Yesus enggo mereken diriNa ngelai doni enda ras kita umat manusia selaku responta maka arus siikutken usihenNa e, ngelai kita bas geluh enda. Kita itepa guna ngelai. Ngelai ertina mereken diri jadi pasu-pasu man kalak sideban. Geluhta jadi penampat man kalak sideban, waktu, pemeteh, perhatin ras kiniliten siibereken kita guna mulahi kalak i bas kesusahen nari janah erbahanca ia ngataken bujur man Tuhan.